

Chris Dammers (AVP)

## “E Shoco lo haya su proteccion segun acuerdonan internacional”

Parlamento di Aruba e siman aki a trata cambio di e Ordenansa Publico cu ta regula e aspectonan di nos bandera, escudo y himno nacional, pa entre otro tambe introduci nos simbolo nacional cu finalmente a bira e Shoco (Athene cunicla aria arubensis).

Cu e nombramento di e Shoco como nos simbolo nacional, nos por mira na e reaccionnan den nos comunidad- desde cu e ley a pasa- cu esaki a keda acepta rond di Aruba, cual aceptacion sigur ta haci mi persona personalmente hopi contento.

### Ley di iniciativa

Desde e aña parlamentario 2011-2012 mi persona a cuminsa y a finalisa un ley di iniciativa pa introduci e Shoco como nos simbolo nacional. Despues cu a consulta cu e minister di Cultura di e tempo ey, Sra. Michelle Hooyboer-Winklaar, mi no a entrega e ley di iniciativa di mi persona mirando cu su

persona tambe tabata pensa den e mesun direccion y tabata preparando un ley cu lo mester a drecha e discusionnan andando rond di e color di e bandera – cu ya no tabata existi mas – y cu e introduccion di e Shoco como un simbolo nacional. E ley aki a keda entrega den e aña parlamentario 2012-2013.

### Sosten unanime

Durante tratamiento di e ley aki e siman aki, mi persona – cu sosten di e fraccion di AVP den Parlamento – a entrega un mocion cu a keda aproba unanimamente. E mocion aki a trece e siguiente consideracion dilanti pa duna e shoco su proteccion, cu no tabata forma parti den e cambio di ley cu nos a trata:

Cu segun conteo nacional di 2011 por wordo bisa cu ta solamente 200 pareha di Shoco tin den existencia na Aruba;

Cu nombramento di e Shoco como simbolo nacional di Aruba lo yuda den conscien-

tisacion di e balor di e Shoco y percura y yuda den su proteccion y su sobrevivencia;

Cu e acuerdo internacional di CITES (Convention on International Trade in Endangered Species of Wild Fauna and Flora) di 3 maart 1973 y e protocol internacional di SPAW (Protocol Concerning Specially Protected Areas and Wildlife) di 18 januari 1990 ta exige cu paisnan mester proteha entre otro e bestianan

cu ta den extincion – cual den nos caso ta entre otro e Shoco.

### Peticion na gobierno

Cu e consideracion aki parlamento ta urgi gobierno pa percura cu e Shoco, su neishi, su territorio, etc., haya su proteccion mas pronto cu ta posibel segun e Ley proteccion di Naturalesa” (AB 1995 no.2), articulo 4 inciso 1, y pa manda un decreto nacio-

nal den linea cu e anexo di e mocion presenta y pa manda e decreto nacional aki mas pronto cu ta posibel pa Raad van Advies.

No solamente a entrega un mocion pero tambe a entrega un decreto nacional – clacaba – cu gobierno por manda Raad van Advies y despues por wordo firma caminda cu ta haci e Shoco un bestia protegi na Aruba. □